

饗禮補遺附錄
求古錄禮說補遺附錄
公羊逸禮考徵





亡 補 禮 饗

纂 錦 諸

叢書集成初編

(補印本)

饗禮補亡及其他二種

一九三九年十二月初版
一九六〇年一月補印

商務印書館出版

上海印刷學校印刷

饗禮補亡

本館據藝海珠塵
本排印初編各叢
書僅有此本

饗禮補亡

清

諸

錦簪

錦字襄七號字文又號草廬浙江縉水人雍正甲辰進士選庶吉士散館歸班舉乾隆丙辰博學鴻詞授編修歷官左贊善

儀禮十七篇有燕禮公食大夫禮而無饗禮饗禮亡矣其見於周禮春秋傳戴記者猶可考也今據周官賓客之聯事而比次之并取傳記中相發明者條注於其下以補亡俟說禮者取裁焉

饗禮大宰掌賓客之式幣帛之式好用之式

春秋傳昭五年朝聘有圭享類有璋小有述職大有巡功設機而不倚爵盈而不飲宴有好貨殮有陪鼎入有郊勞出有贈賄禮之至也

膳夫王賓客食則徹王之胾俎燕飲則爲獻主

春秋傳宣十六年晉侯使士會平王室王享之原襄公相禮殺烝武子私問其故王聞之召武子曰季氏而弗聞乎王享有體薦宴有折俎公當享卿當宴王室之禮也武子歸而講求典禮以脩晉國之法

餘見國語

內饗掌割亨之事外饗共凡賓客之饗殮亨人共大羹鉶羹獸人共其死獸生獸入于腊人獸人共其魚之蠹薨腊人共其脯腊凡乾肉之事

聘義酒清人渴而不敢飲也肉乾人飢而不敢食也曰莫人倦齊莊正齊而不敢解惰以成禮節

酒正共禮酒。其后之致飲于賓客之禮。醫醢醢皆使其士奉之。酒人共禮酒飲酒而奉之。漿人共稍禮。共夫人致飲于賓客之禮。清醴醫醢醢而奉之。

春秋傳莊十八年。虢公晉侯朝王。王饗禮。命之宥。僖二十八年。王享禮。命晉侯宥。凌人共冰。

案。傳昭四年。古者日在北陸而藏冰。其出之也。朝之祿位賓食。于是乎用之。

籩人共其薦簋羞籩。

案。禮器。諸侯相朝無籩豆之薦。與此異。

醢人共醢五十。醢人共醢五十。

郊特牲。恆豆之苴。水草之和氣也。其醢。陸產之物也。加豆。陸產也。其醢。水物也。

鹽人共其形鹽散鹽。

春秋傳。僖三十年。王使周公閱來聘。饗有昌歜。白黑形鹽。辭曰。國君文足昭也。武可畏也。則有備物之饗。以象其德。薦五味。羞嘉穀。鹽虎形。以獻其功。吾何以堪之。

內宰。凡賓客之裸獻。瑤爵皆贊。致后之賓客之禮。

坊記。禮非祭不交爵。以此坊民。陽侯猶殺繆侯而竊其夫人。故大饗廢夫人之禮。注。夫人之禮使人攝。闔人設門燎。蹕宮門廟門。

案燎地燭也。束葦纏布以蜜塗之。天子百。公五十。侯伯子男皆三十。記曰。庭燎之百。由齊桓公始也。又春秋傳襄三十一年。諸侯賓至。甸設庭燎。周禮甸師帥其徒以薪蒸役外內饗之事。是知門燎又甸人掌也。又案郊特牲鄭註云。賓入大門。謂朝聘之賓行朝聘既畢燕饗之時。燕則大門是寢門也。饗則大門是廟門也。

寺人帥女宮而致於有司。內豎爲內人蹕。牛人共其膳羞之牛。

郊特牲。天子適諸侯。諸侯膳用犢。諸侯適天子。天子賜之禮大牢。貴誠之義也。大饗尙脰修而已矣。疏。設大牢之饌。先薦脰修于前。注亦不饗味也。

川衡共川奠。澤虞共澤物之奠。

案此備物之饗。以象其德。已見前鹽人下。

圉人共其生獸死獸之物。場人共其果蓏。舍人共簠簋實之陳之。春人共其食米。饌人共其簠簋之實。案春秋傳羞嘉穀見前。

大宗伯以饗燕之禮親四方之賓客。大賓客則攝而載果。小宗伯辨六宗之名物以待賓客。以時將瓊果。肆師涖筵几。築鬻贊果。將共設匪饗之禮。饗食授祭。鬱人掌果事。

郊特牲。諸侯爲賓。灌用鬱鬯。灌用臭也。

雞人夜嘑旦以詔百官。司几筵掌几席。大饗射。

郊特牲。大饗。君三重席而酢焉。三獻之介。君專席而酢焉。此降尊以就卑也。

典瑞。掌裸圭有瓊以祿賓客。璋邸射以造贈賓客。凡賓客之事。共其玉器而奉之。內宗薦加豆籩。及以樂徹。則佐傳豆籩。外宗佐王后薦玉豆。祇豆籩。及以樂徹。亦如之。王后以樂羞蠶則贊。

春秋傳。僖二十二年。楚子饗于鄭。九獻。庭實旅百。加籩豆六品。昭六年。季孫宿如晉。晉侯享之。有加籩。武子退。使行人告曰。小國之事大國也。苟免于討。不敢求貺。得貺不過三獻。今豆有加。下臣弗堪。無乃戾也。韓宣子曰。寡君以爲驩也。對曰。寡君猶未敢。況下臣。君之隸也。敢聞加貺。固請徹加而後卒事。晉人以爲知禮。

案疏。楚實子爵。以霸主自許。故鄭以上公極禮待之。饗受皆非也。

大司樂宿縣。遂以聲展之。出入則令奏王夏。肆夏。

春秋傳。襄四年。穆叔如晉。晉侯享之。金奏肆夏之三。不拜。工歌文王之三。又不拜。對曰。三夏天子所以享元侯也。使臣弗敢與聞。文王兩君相見之樂也。臣不敢及。

樂師序其樂事。令奏鍾鼓。令相大師帥瞽登歌。令奏擊拊。下管播樂器。令奏鼓輶。小師登歌擊拊。下管擊應鼓。鍾師奏燕樂。笙師共鍾笙之樂。鐃師鼓金奏之樂。鞀師掌鞀樂。帥屬舞。旄人舞其燕樂。籥師鼓羽籥之舞。典庸器帥其屬而設筥簋。陳庸器。司干授舞器。既舞則受之。

仲尼燕居。子曰。禮有九。大饗有四焉。苟知此矣。雖在獻畝之中。事之聖人已。兩君相見。揖讓而入門。入

門而縣興。揖讓而升堂。升堂而樂闋。下管象武。夏籥序興。陳其薦俎。序其禮樂。備其百官。如此而后君子知仁焉。行中規。還中矩。和鸞中采。齊客出。句以雍徹。句以振羽。是故君子無物而不在禮矣。入門而金作。示情也。升歌清廟。示德也。下而管象。示事也。是故古之君子。不必親相與言也。以禮樂相示而已。郊特牲。賓入大門而奏肆夏。示易以敬也。卒爵而樂闋。孔子屢歎之。奠酬而工升歌。發德也。歌者在上。匏竹在下。貴人聲也。樂由陽來者也。禮由陰作者也。陰陽和而萬物得。

大司馬羞牲魚授其祭。小司馬饗射掌其事。量人制其從獻肺燔之數。大僕賓客正王之服位。詔饗儀。小臣饗食如大僕之灋。齊僕朝覲宗遇饗食。皆乘金路。其灋儀各以其等爲車送迎之節。士師諸侯爲賓。帥其屬而蹕于王宮。訝士帥其屬而爲之蹕。職金饗諸侯共其金版。

案鄭康成注。帥蹕兼饗食時而言。

大行人掌大賓之禮。大客之儀。上公之禮。廟中將幣三享。王禮再裸而酢。饗禮九獻。食禮九舉。諸侯廟中將幣三享。王禮壹裸而酢。饗禮七獻。食禮七舉。諸伯如諸侯之禮。諸子廟中將幣三享。王禮壹裸不酢。饗禮五獻。食禮五舉。諸男如諸子之禮。小行人掌邦國賓客之禮籍。以待四方之使者。司儀掌九儀之賓客。詔王儀。南鄉見諸侯。土揖庶姓。時揖異姓。天揖同姓。及其摯之。各以其禮。公於上等。侯伯於中等。子男於下等。其將幣亦如之。賓饗食如將幣之儀。賓拜饗食。賓繼主君。如主國之禮。大夫饗食如將幣之儀。諸侯諸伯諸子諸男之相爲賓也。各以其禮相待也。如諸公之儀。諸公之臣相爲國客。侯伯子男之臣相爲國

客侯伯子男之臣以其國之爵相爲客而相禮其儀亦如之凡四方之賓客禮儀辭命餽牢賜獻以二等從其爵而上下之凡賓客送迎同禮凡諸侯之交各稱其邦而爲之幣以其幣爲之禮掌訝前驅聚櫜待事掌交通事

案鄭康成注繼主君。僨主君也。若饗食主君及燕亦速焉。賈氏公彥疏。僨者報也。報主君爲僨。聘禮賓無饗食。速主君者。臣於君。雖他國亦不敢速君。故記云。大夫饗君非禮是也。若兩君有僨。皆得速主君。案春秋傳莊二十一年。鄭伯享王闕西辟。樂備郊。特牲云。天子無客禮。莫敢爲主焉。君適其臣。升自阼階。不敢有其室也。

春秋傳莊十八年。虢公晉侯朝王。王饗禮。命之宥。皆賜玉五。馭馬三匹。非禮也。僖二十四年。宋成公入鄭。鄭伯將享之。皇武子曰。宋先代之後也。於周爲客。天子有事。膳焉。有喪。拜焉。豐厚可也。鄭伯享宋公。有加禮。二十八年。王享禮。命晉侯宥。策命晉侯爲侯伯。賜之大輅之服。戎輅之服。彤弓一。彤矢百。玁弓矢千。鉅鬯一。虎賁三百人。文三年。公如晉。晉侯享之。賦菁菁者莪。莊叔以公降拜。曰。小國受命於大國。敢不愼儀。君貺之以大禮。何樂如之。抑小國之樂。大國之惠也。晉侯降辭。公登成拜。公賦嘉樂。四年。衛甯武子來聘。公宴。爲賦湛露及彤弓。不辭。又不荅賦。使行人私焉。對曰。臣以爲肄業及之也。昔諸侯朝正於王。王宴樂之。於是乎賦湛露。則天子當陽。諸侯用命也。諸侯敵王所愾。而獻其功。於是乎賜之彤弓一。彤矢百。玁弓矢千。以覺報宴。今陪臣來繼舊好。君辱貺之。其敢干大禮。以自取戾。

宣十六年。晉侯使士會平王室。定王享之。原襄公相。禮殺烝。武子私問其故。王聞之。召武子曰。季氏而弗聞乎。王享有體薦。宴有折俎。公當享。卿當宴。王室之禮也。武子歸而講求典禮。以修晉國之法。成九年。季文子如宋致女。復命。公享之。賦韓奕之五章。穆姜出於房。再拜曰。大夫勤辱。不忘先君。以及嗣君。施及未亡人。先君猶有望也。敢拜大夫之重勤。又賦綠衣之卒章而入。十四年。衛侯享苦成叔。苦成叔傲。甯武子曰。古之爲享食也。以觀威儀。首禍福也。故詩曰。兕觥其觶。旨酒思柔。彼交匪傲。萬福來求。今夫子傲。取禍之道也。襄八年。晉范宣子來聘。且拜公之辱。告將用師于鄭。公享之。賓將出。武子賦彤弓。宣子曰。城濮之役。我先君文公獻功于衡雍。受彤弓于襄王。以爲子孫藏。句也。先君守官之嗣也。敢不承命。君子以爲知禮。二十八年。蔡侯歸自晉。入于鄭。鄭伯享之。不敬。子產曰。蔡侯其不免乎。日其過此也。君使子展迂勞於東門之外。而傲。吾曰。猶將更之。今還受享而惰。乃其心也。君小國。事大國。而惰傲。以爲己心。將得死乎。昭三年。鄭伯如楚。子產相。楚子享之。賦吉日。子產乃具田備。

掌客。掌四方賓客之牢。禮餼。獻飲食之等數。王合諸侯而饗。禮則具十有二牢。庶具百物備。諸侯長十有再獻。凡諸侯之禮。上公五積。皆眡殮。牽三問。皆修。羣介行人宰史皆有牢殮五牢。食四十簋。十豆。四十有二十壺。四十鼎。簋十有二。牲三十有六。皆陳。饗餼九牢。其死牢如殮之。陳牽四牢。米百有二十。宮醢醢百有二十。饗車皆陳。車米眡生牢。牢十車。車乘有五。斂車禾眡死牢。牢十車。車三秣。芻薪倍禾。皆陳。乘禽曰九十雙。殷膳大牢。以及歸三饗三食三燕。若弗酌。則以幣致之。凡介行人宰史皆有殮饗餼。以其爵。

等爲之牢禮之陳數。唯上介有禽獻。夫人致禮。八壺八豆八簋。膳大牢。致饗大牢。食大牢。卿皆見以羔。膳大牢。侯伯四積。皆眡殮。牽再問。皆修殮。四牢。食三十有二。簋八。豆三十有二。鉶二十有八。壺三十有二。鼎簋十有二。腥二十有七。皆陳饗餼七牢。其死牢如殮之陳。牽三牢。米百筥。醢醢百。皆陳。米三十車。禾四十車。芻薪倍禾。皆陳。乘禽日七十雙。殷膳大牢。三饗再食再燕。凡介行人宰史皆有殮饗餼。以其爵等爲之禮。唯士介有禽獻。夫人致禮。八壺八豆八簋。膳大牢。致饗大牢。卿皆見以羔。膳特牛。子男三積。皆眡殮。牽壹問以修殮。三牢。食二十有四。簋六。豆二十有四。鉶十有八。壺二十有四。鼎簋十有二。牲十有八。皆陳饗餼五牢。其死牢如殮之陳。牽二牢。米八十筥。醢醢八十。皆陳。米二十車。禾三十車。芻薪倍禾。皆陳。乘禽日五十雙。壹饗壹食壹燕。凡介行人宰史皆有殮饗餼。以其爵等爲之禮。唯上介有禽獻。夫人致禮。六壺六豆六簋。膳眡致饗親見。卿皆膳特牛。凡諸侯之卿大夫士爲國客。則如其介之禮以待之。

案此條不專言饗。備載之。

春秋傳僖十二年。王以上卿之禮饗管仲。管仲辭曰。臣賤有司也。有天子之二守國。高在。若節春秋。來承王命。何以禮焉。陪臣敢辭。成二年。晉侯使鞏朔獻齊捷于周。王使委于三吏。禮之如侯伯。克敵使大夫告慶之禮。降于卿禮一等。王以鞏伯宴而私賄之。使相告之曰。非禮也。勿籍。成十二年。晉卻至如楚聘。子反相。至登金奏作。驚而走出。賓曰。世之治也。諸侯閒於天子之事。則相朝也。於是乎有饗宴之禮。享以訓共儉。宴以示慈惠。共儉以行禮。而慈惠以布政。政以禮成。民是以息。百官承事。朝而不夕。

此公侯之所以扞城其民也。襄十九年，公享晉六卿于蒲圃，賜之三命之服。軍尉司馬司空與尉侯奄皆受一命之服，賄荀偃束錦加璧，先吳壽夢之鼎。季武子如晉拜師，晉侯享之。范宣子賦黍苗，武子興，再拜稽首曰：「小國之仰大國，如百穀之仰膏雨焉。若常膏之，其天下輯睦，豈惟敝邑？」賦六月。二十年，季武子如宋，報聘也。褚師段逆之，以受享。賦棠棣之七章，以卒。宋人重賄之，歸復命。公享之，賦魚麗之卒章。公賦南山有臺，武子去所，曰：「臣不堪也。」二十六年，鄭伯賞入陳之功，享子展，賜之先路三命之服，先八邑。賜子產次路，再命之服，先六邑。子產辭邑，曰：「自上以下，隆殺以兩，禮也。臣之位，在少，且子展之功，臣不敢及賞禮。」請辭邑。公固予之，乃受三邑。二十七年，鄭伯享趙孟于垂隴，子展、伯有、子西、子產、子大叔、二子石從。趙孟曰：「七子從君，以寵武也。」請皆賦，以卒君貺。武亦以觀七子之志。昭元年，趙孟、叔孫豹、曹大夫入于鄭，鄭伯兼享之。子皮戒趙孟，禮終。趙孟賦匏葉，子皮遂戒穆叔，且告之。穆叔曰：「趙孟欲一獻，子其從之。」及享，具五獻之籩豆於幕下。趙孟辭，私于子產，曰：「武請于冢宰矣。」乃用一獻。趙孟爲客，禮終乃宴。二年，韓宣子來聘，公享之。季武子賦緜之卒章，韓子賦角弓。季武子拜曰：「敢拜子之彌縫敝邑，寡君有望矣。」

凡禮賓客，國新殺禮，凶荒殺禮，札喪殺禮，禍裁殺禮。在野在外殺禮，凡賓客死，致禮以喪用。賓客有喪，唯芻稍之受，遭主國之喪，不受饗食，受牲禮。

春秋傳昭十二年，晉侯享諸侯，子產相鄭伯，辭于享，請免喪而後聽命。晉人許之，禮也。

聘禮記凡致禮皆用其饗之加籩豆無饗者無饗禮注士介無饗禮

案嚴陵方氏慤曰禮之言大饗者十有一而其別有五祭帝一也祫祭先王二也天子饗元侯三也兩君相見四也凡饗賓客五也若月令季秋大饗帝禮器郊特牲大饗腥祭帝之大饗也禮器又言大饗其王事與大饗之禮不足以大旅祫祭先王之大饗也郊特牲又言大饗尚服修天子饗諸侯之大饗也郊特牲又言大饗君三重席而酢仲尼燕居言大饗有四坊記言大饗廢夫人之禮兩君相見之大饗也大司樂言大饗不入牲雜記言大饗卷三牲之俎凡饗賓客之大饗也大約饗禮以天子饗諸侯爲正詩小雅彤弓覲禮同姓大國伯父異姓伯舅同姓小邦叔父異姓叔舅饗禮乃歸是也若大夫而饗君非禮也由三桓始也其後以漸而凌替矣補饗禮

饗禮補亡序

儀禮自漢無全書傳世者篇惟十七河間獻王得古經于淹中合五十六篇內十七篇與世傳者無異雖經獻上而未立于學官學者不能舉其目其多寡止此數與否不可得而知也當曰諸經出自煨燼之餘並多殘缺尙書止行今文二十九篇周禮缺冬官及小司馬等古禮文云二百餘篇者准大戴記目止存八十五以此推之儀禮其散佚固已多矣觀其中所載不過儀文度數之末而自昔重之不與傳記伍至朱子則尤重之嘗疏請立以爲經而未蒙報可暮年猶拳拳不釋作經傳通解未及告成而卒然則章縫之士又安得以殘編斷簡而忽視之耶元臨川草廬吳氏毅然繼朱子之志作纂言及考注病其亡失者

多爲補經八篇。補傳十又五篇。其餘悉付諸記。本末略已粗完。獨于饗禮文未有所特著。推其意。蓋緣第八第十聘。覲篇中俱兼及饗食。謂其故可以相通而略之也。雖然。饗之爲禮也大。其事非一端。有祭帝祫祭之大享。復有天子享元侯。兩君相見。及凡享賓客之各異。非一聘之所能該也。使不自爲一篇。非惟不可考者。無從而知。卽有可考者。亦無所藉而得察其全。斯亦前賢未竟之緒也。秀水宮贊諸草廬先生。素諳三禮之學。慨然有感于斯。乃類萃其可考者。獨成一帙。以補饗禮之亡。取材于周官及春秋內、外傳、大小戴記之所有。聯事屬詞。羣分類聚。一展卷而粲若列眉。雖不可考者。亦得因是而例推焉。謂非稽古之一大快歟。獨念士人窮經。事已不易。更進而補經之亡。其難殆且數倍。冬官之缺。昔人補以考工。未嘗不善。而議者猶訾其不類。則以後出之簡策。其文雖高古。究不足以續經也。故自宋以來。諸儒擬補紛紛。終不得歸畫一。補亡顧可易言哉。今茲所纂。一以周禮爲宗。周禮固三禮之綱領也。朱子稱爲運用天理之書。其爲古經明甚。以經代經。孰得而議之。至其分注之傳記。皆各有源本。足徵非雜就附會之比也。體式天然。不煩強造。所謂易簡而天下之理得者。于是乎在。豈徒爲好學多聞之助。其于聖代禮教文治之休明。鼓吹潤色。自必有所得當矣。余以舊史且忝爲同人。故樂從而綴言于末。乾隆十八年歲次癸酉仲冬日南至。白山洙蘭秦庸伯序。

求古錄禮說補遺

附 續

金 鶚 著